



Oproštaj od stare godine – samoobračun i pouka (Meka)

Hatib: dr. Usama ibn Abdullah Hajjat

24. zulhidže 1446. po Hidžri / 20. juni 2025.

Hvala Allahu, Onome Koji upravlja stanjima i uređuje stvari, Gospodaru istoka i zapada. Nema boga osim Njega, Silnog i Onoga Koji mnogo prašta. Hvalim Njega, Živog i Vječnog kroz sva vremena i vijekove. Svjedočim da nema boga osim Allaha, Jedinog, Koji nema sudruga, i svjedočim da je naš prvak i vjerovjesnik Muhammed, sallallahu alejhi ve sellem, Allahov rob i poslanik, koji je poslan svim ljudima s uputom i svjetlom. Allahu, smiluj se, blagoslovi i spasi Svoga roba i poslanika Muhammeda, sallallahu alejhi ve sellem, njegovu porodicu i ashabe, koji su bili iskreni prema Allahu, nadajući se trgovini koja neće propasti, kao i onima koji ih slijede u dobročinstvu sve do Dana proživljenja, obračuna i okupljanja.

O vjernici, bojte se Allaha i tražite put do Njega kroz tevhid – iskrenu i čistu vjeru u Njegovu jednoću, spominjanje Njega, zahvalnost Njemu, Njegovo potpuno obožavanje i pokoravanje Njegovom sudu. Neka vas ne zavara ovaj svijet, i neka vas šejtan u Allaha ne pokoleba.

O muslimani, oproštajni trenutak budi emocije i izaziva tugu, jer je povezan s rastankom, najavljuje kraj i ukazuje na završetak. Prošla je, o vjernici, još jedna godina života, u kojoj su se mijenjala stanja, okončali životi, i u kojoj su ummet zadesile teške kušnje koje remete spokoj. Dok je za nemarne i zaokupljene zabavom prolazak dana i noći samo njihova smjena, za one koji pameti imaju to je živi podsjetnik na pouku i stalni izvor savjeta i opomene. To najbolje oslikava izreka Ebu Derdaa, radijallahu anhu, koju prenosi Hasan el-Basri, Allah mu se smilovao: "O sine Ademov, ti si samo skup dana – kada prođe jedan dan, otišao je dio tebe." Također, jedan od dobrih prethodnika rekao je: "Kako se prolasku godina može radovati onaj čiji dan 'ruši' njegov mjesec, mjesec njegovu godinu, a godina njegov život? Kako se može radovati





onaj koga njegovi dani vode ka smrti, a život ka kraju? Onaj kome su dani i noći jahalice – one ga vode, makar on i ne išao.”

O vjernici, razboriti ljudi, na kraju godine, zaustavljaju se kako bi se preispitali, pred Allahom, i sveli račun sami sa sobom, poput mudrog trgovca koji preispituje svoju trgovinu, gleda koliki mu je dobitak i gubitak, traži uzroke i razmatra šta je bilo ispravno, a šta pogrešno.

Zaista, postupak svjesnog muslimana, koji krene ovim ispravnim putem nadilazi sve drugo po plemenitosti svojih ciljeva, uzvišenosti svojih namjera i čestitosti svojih težnji, jer je njegov trud usmjeren ka očuvanju istinskih vrijednosti, čija trgovina nikada ne propada, čije tržište nikada ne stagnira i čija dobit nikada ne nestaje. To su blaga dobrih djela i riznice trajnih vrijednosti (el-bakijatus-salihah), kojima je Allah dao uzvišeno mjesto i plemenit položaj, i koje je uzdigao iznad svega drugog, rekavši: “Bogatstvo i sinovi ukras su u životu na ovome svijetu, a dobra djela, koja vječno ostaju, bit će od Gospodara tvoga bolje nagrađena i ono u što se čovjek može pouzdati” (El-Kehf, 46).

Zato je briga o samopreispitivanju i težnja ka obračunu sa samim sobom stalna praksa budnih, putokaz razboritih i staza bogobojaznih. Njih od toga ne odvrćaju dunjalučki užici, besposlica, prazna priča, sjaj, raskoš i ukrasi. Oni kroz život prolaze s obiljem Allahove pomoći u ostvarenju želja, dostizanju nada, postizanju ciljeva i očuvanju od posrtaja.

Suprotno njima su nemarni, koji su zaneseni u svojoj zabludi i nemaru – oni se ne bude iz svoje omamljenosti da bi razmotrili svoje dobitke i gubitke, da bi popravili ono što su propustili i da bi uzeli pouku iz iskušenja i nedaća. Oni su od onih koji su zaboravili Allaha, pa im je On dao da zaborave sami sebe – oni su grešnici, kao što Uzvišeni kaže: “I ne budite kao oni koji su zaboravili Allaha, pa je On učinio da zaborave sami sebe – to su pravi grešnici” (El-Hašr, 19).

O vjernici, veza između samopreispitivanja i težnje ka promjeni nabolje je čvrsta i neraskidiva. Jer, samopreispitivanje i svođenje računa sa sobom otkrivaju čovjeku





njegove slabosti, nedostatke i uzroke propusta. A kada se iskreno odluči, popravi svoju namjeru, jasno mu se ukaže put i potvrdi to djelom – dolazi Allahova pomoć, neiscrpna i stalna, koja vodi ka lijepom završetku i plemenitoj nagradi. “One koji se budu zbog Nas borili Mi ćemo, sigurno, putevima koji Nama vode uputiti; a Allah je, zaista, na strani onih koji dobra djela čine!” (El-Ankebut, 69)

O vjernici, potreba za koraćanjem putem samopreispitivanja i samoobraćuna nije ograničena samo na pojedince ili određenu skupinu ljudi, već je neophodna cijelom muslimanskom ummetu. Ummet ne može bez toga, naročito kada ispraća staru, a dočekuje novu godinu. Međutim, kada je riječ o ummetu, ta vrsta preispitivanja ima šire dimenzije, obuhvata veći prostor, donosi veće koristi i ostavlja trajniji trag. Istinu je rekao Uzvišeni: “O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite.” (El-Hašr, 18)

O vjernici, samopreispitivanje je jedan od najočitijih dokaza zrelosti čovjekovog razuma i njegove iskrene brige za vlastitu sreću i uspjeh u svemu što čini ili ostavlja. To je trenutak koji nijedan razborit čovjek ne smije izostaviti – nakon svakog djela, na kraju svake faze, i po završetku svakog životnog poglavlja – ako želi da mu se stanje popravi, da mu se život uredi i da mu završetak bude sretan. Tako će postići veliku pobjedu i na dunjaluku i na Sudnjem danu, kada svi budu svjedoci.

Zato se bojte Allaha, o ljudi, i budite ustrajni u ovom iskrenom i preciznom nadzoru nad sobom, posebno sada kada ulazite u novu fazu svojih djela i započinjete novo poglavlje svog života. Na tom putovanju neophodno vam je podsjećanje i pouka iz prošlosti, kao i odlučnost da ispravite ono što je bilo i planirate ono što dolazi.

Donosite salavate i selame na najbolje Allahovo stvorenje, Muhammeda, sina Abdullahovog, jer vam je to naređeno u Allahovoj Knjizi, gdje Uzvišeni kaže: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE

oprost za sebe, vas i sve muslimane od svakog grijeha, a tražite i vi, On mnogo prašta
i milostiv je.

